

Bolalik – beg'uborlik

Bola – bu soʻzni eshitganimizda koʻz oldimizga quvnoq, oʻyinqaroq yosh avlod gavdalanadi. Ularning kulgusi, koʻzlaridagi quvonchi butun olamni yoritadigandek goʻyo. Xalqimiz juda ham bolajon xalq. Yurtimizda yoshlarga juda ham katta eʼtibor berilib kelinadi. Shu jumladan, bizning institutimiz aʼzolari ham bolalarning quvonchini koʻrishga shaylandilar. Ana shunday ezgu gʻoyani amalga oshirishga shaylangan holatda 1-iyun “Xalqaro bolalarni himoya qilish kuni” munosabati bilan Toshkent irrigatsiya va qishloq xoʻjaligini mexanizatsiyalash muhandislari instituti rahbariyati va institutning Yoshlar Ittifoqi Boshlangʻich tashkiloti faol talabalari bilan birgalikda “Bolalarga bering dunyoni” shiori ostida Respublika Onkologiya markazida xayriya tadbiri oʻtkazildi.

Tadbir boshlanishidan oldin talabalarimiz multfilm qahramonlari bilan birgalikda oʻzlarining olib kelgan koʻkrak nishonlarini bolalarga ulashdilar. Soʻng tadbirni ochib berish uchun soʻzga institutimizning professor oʻqituvchilari chiqdilar. Tadbir juda ham qiziqarli hamda turli oʻyinlarga boy boʻldi. Bolajonlarning oʻzlari yod olgan sheʼrlari tadbirga koʻrk bagʻishladi. Bayramimizda “Chuchuva”, “Oshxona shashkasi”, “Kim chaqqon”, “Pantomima” kabi oʻyinlar boʻlib oʻtdi. Shu bilan birgalikda bolalarni bayram bilan tabriklash uchun qoʻshiqchilar ham tashrif buyurdilar.

Institutimizning “Yosh targʻibotchilar” jamoasi ham oʻzlarining chiqishlari bilan bolalarga quvonch ulashdilar. Tadbirning yakunida bolalar bizlar uchun oʻz qoʻllari bilan ranglar orqali dastxat tushirib berdilar. Soʻng institutimiz talabalari tomonidan bolajonlarga estalik sovgʻalari tarqatildi. Shuningdek, bolajonlarning ota-onalariga ham institutimiz aʼzolari tomonidan moddiy yordam koʻrsatildi. Shu tadbirni oʻtkazishdagi qoʻshgan oʻz hissasi uchun institutimizning barcha-barcha aʼzolariga oʻz minnatdorchiligimizni bildiramiz. Bemalol aytishimiz mumkin-ki, sizdek insonlarning koʻmaklari asosida 2018-yilning 31-may kuni oʻtkazilgan xayriya tadbiri bolalarga unutilmas quvonch bagʻishladi.



Institut Yoshlar Kengashi media guruh rahbari Ulugʻbek Manzirboyev axboroti,

Institut matbuot kotibi Rahimboy Jumaniyozov.